



Minggu, 02 Juni 2024
Ogen: Kuan-kuanen 23:12-16



Erlajar Mpekeri Gegeh



Tumbuhkan gairah untuk terus belajar. Kalau kamu melakukannya kamu tidak akan pernah berhenti untuk bertumbuh (Antony J Angelow). I bas kegeluhen manusia si ikataken bertumbuh i bas kerina dampar subuk daging kula, perukuren, kepentaren. E maka guna si e arus turah semangat, sura-sura sehat, rukur mehuli bage pe nggit erlajar. Arah si e me maka banci kita reh belinna. I bas proses erlajar, kepeken la banci main-main, arus tutus, la saja makeken waktu alu mehuli, ndarami guru si banci mabai kita ku si mehuli tapi pe lit sura-sura si mbelin.

Tema si seh man banta i bas renungen ta enda e me erlajar mpekeri gegeh. Rikutken situasinta i bas jaman genduari, berhadapen kita ras anak-anakta generasi milenial ras alpa, megati kurang si akap ia mpekeri gegeh. Payo, banci kepe erlajar lanai mpekeri gegeh paksa enda, enggo santai kal ia ndalani kegeluhen, e maka kurang siakap lalap ia i bas ndarami pemeteh enda. Caranta ngajari ia genduari pe lanai bagi si nai, lanai lit gunana mekpek ia, labo ralo. Kita orangtua me genduari si arus erlajar mpekeri gegeh ras makeken waktuta alu mehuli gelah tambah kepentarenta i bas mabai ras ngajari anak-anakta enda. Si darami cara gelah turah lalap sura-suranta erlajar, ula ngelabuh alu bage si peturah ras si motivasi ka sura-sura anakta i bas erlajar. Amin lanai seri caranta erlajar ras ndarami pemeteh e. Kalak si tetap nggit erlajar me si la pernah ngadi reh belinna, tambah rusur kepentaren, pemeteh ras pengertinna. Bage me si bere usihen gelah ilakoken anak-anakta ka si e alu bage meriah ukurta adi pentar anakta. Ersurak pusuhta ngidah ras meggi anak-anakta nggeluh i bas kebujuhen ras si mehuli. E maka perlu kal si rangsang sura-sura erlajar anak anakta, i tengah-tengah buena godan man bana arah erbage game ras tawaren gajet genduari enda. E maka kita selaku orang tua erlumba ras kemajun teknologi enda. Tetap semangat, ula ngelabuh.